

Case

F

39

.326


1609c

COPPIE D'VNE LETTRE ES-
crite à Bolongne, en laquelle sont contenues les
perfections, & excellences de la compagnie des
Peres Iesuites: Ensemble les resolutions de plu-
sieurs contredits, faicts à iceux Peres & leurs
institutions.

Traduite d'Italien en François.

M. D. D. IX. Indiction v r i.

Tres illustre & comme fils tres aimé au Seigneur.



I iamaïs il arriuoit nouuelles à l'ame
 pieuse de vostre tresdeuot pere, comme
 vous abandonné aués vos estudes, & mé-
 prise ma protection, pour certain quel-
 que part quelle soit, elle en ressentiroit
 vn tresgrand desplaisir: Puisque vous ay mant ou-
 tre mesure, & ialoux de vostre salut, recognoissant
 ne vous pouuoir laisser ny en meilleur appuy, ny
 en plus seure tutelle que de la nostre. A peine com-
 mençastes vous à desnouer vos iambes, & marcher
 tout seul, qu'il vous amena à nostre Eglise: Où
 vous ayant fait cognoistre à tous les Peres l'vn a-
 pres l'autre, vous recommanda à eux; & pource
 que sur l'heure ie fus espris de vostre viuacité & de
 vostre proportionnée beauté par dessus tous les
 autres, ie m'offri à lay, pour vous enseigner, & a-
 uoir soin de vous: Il s'en estima tres heureux, con-
 fessant qu'en sa vie il n'auoit esprouué allegresse
 plus grande que celle là. Et pour vne certaine in-
 disposition vous ayant voué au beat Ignace nostre

fondateur, afferma plusieurs fois ne vouloir que la-
 mais vous vous separassiez d'avec moy, Ains que
 viuant avecques moy en nostre compagnie, nostre
 vie d'eust s'acheuer ensemble. Depuis ce temps,
 ne manquant en sorte aucune à l'offre que ie luy
 fis : Ains m'employant avec vne sincere affection,
 ie fis en sorte, que comme il est cognu à chacun, en
 peu de temps vous appristes plus de meurs, & de
 doctrine, que lon ne pouuoit attendre de vos ieu-
 nes ans, avec plus d'honneur de nostre maison, &
 mienne vaine gloire, qu'en quelque temps que ce
 ait esté, autre escholier quelconque y ait ia-
 mais apportee. Ce qui s'augmentoit de iour en
 iour pour l'attente que chacun auoit de vous rece-
 uoir en bref (suivant la volonté de vostre pere) au
 nombre de nos freres, & nouices : & moy de finir
 mes ans en vostre ay mable conuersation. Mais vous
 au rebours peu memoratif des commandemens pa-
 ternels, entierement contraire à vostre bien & à sa
 volonté, vous estes adonné à la hantise (tant blas-
 mee de moy) de ces encoqueluchez Religieux,
 vous ayant tousiours destourné de leurs vices &
 faulles institutions, & par vn si long temps vous
 estant absenté de ces escholles, auez reuocé en
 doute toute nostre creance, & moy en particulier
 priué de toute consolation. Je sçai bien qu'alleché
 par eux d'une infinité de deceneurs sylogismes,
 vous croirez toucher le ciel avec les mains : Mais
 en fin enueloppé parmi les pechez en vne tres mes-
 chante doctrine, vous descouurirez que le fruit de
 ceste nouvelle amitié, n'est autre chose, que vous
 abandonner à vne pernicieuse liberté, avec la per-

te entiere du grand merite que vous auez com-
 mencé d'acquérir, par le moyen de nostre singu-
 liere obedience: dequoy il me fasche grieve-
 ment, & m'afflige encor plus, que otieusement vous per-
 dez la fleur de vos ans, & allez consommant ceste
 beauté & viuacité d'esprit, que Dieu vous auoit
 donnée, pour l'employer au seruice de la Religion.
 Et bien que la verdeur de vostre aage vous rende
 digne d'excuse en mon endroit, ce n'est pas pour-
 tant que quelque iour quand l'on scaura les pro-
 messes & serments, que tant de fois vous m'auiez
 iurez, & que vous auez faits en la presence de Dieu
 en l'Eglise mesme, vous n'en encourez vn tresgrand
 blasme, & marque d'infidelité vers ceux de vostre
 cognoissance & toute la ville: Mais que di-ie de la
 ville & des amis, Dieu mesme offensé des periures,
 pourroit vn iour sur vous en faire vn iugement se-
 uere: Car les fleaux destinez du Ciel ne se peuuent
 euitier par la ieunesse, ny ne leur peut on pas faire
 resistance par la force du corps, comme par plu-
 sieurs de nos histoires imprimées vous pouuez a-
 uoir esté aduertí. Mais tost ou tard, si vous ne vous
 deliurez du peché, sortiront leur effet. Et pourtant
 secouez d'autour de vous, escartant le precipice ou
 il vous tallonne, & retournez au bon chemin, con-
 sidererez de quelle hauteur de vertu & de meurs vous
 estes tombé, proche du gouffre infernal & de la
 damnation eternelle. Considererez que vostre def-
 funct pere vous ayant laíssé, quoy que tres noble,
 autant qu'aucun autre neantmoins avec peu de
 moyens & grand nombre de freres, Vous ne pour-
 rez viure au monde, ou vous y maintenir avec ce

lustre, que vostre naissance, & la grandeur de vostre famille requiert. Que si pour le present courtisé & beneficié vous coulez avec quelque apparence d'honneur, bien tost le temps enuieux vous desrobera ceste vigueur de ieunesse, & ceste gail-lardise de cœur, qui fait que tout vous plaise, & donne contentement & vous chargeant de mille defauts, quand le repentir ne seruira plus de rien, vous vous sentirez precipité en l'estroite prison de misere, ou la fortune repaist les hommes endormis & irresolus, de la fumee des vaines esperances, vous scaurez que les affaires de la ieunesse, ces desirs puerils qui nous trauaillent durant nos premiers ans, aisement se peuuent appaiser: La nature desirieuse de la diuersité, ayant pourueu qu'en chaque lieu naissent & se trouuent choses bonnes pour la ieunesse & enfance: Mais en l'aage plus meur, & principalement en la vieillesse, presque comme oyseaux qui pouuans voller hors du nyd sont abandonnez de pere & mere, sont en necessité de se mesme pourchasser leur vie: Alors les passions, & les necessitez le font ressentir, & les choses ordinaires ne peuuent pas fournir à tous nos manquements: Au contraire les viandes, & autres exercices & vsages de ieunesse reussissent nuisibles & mortelles à qui s'en veut seruir en vieillesse, pource que la nature attentue à nouueaux ouurages, se souciant peu de nous, permet que tout se gaste & consomme. Pourtant premier que les ans se changent, & que tous destourbiers ne vous surprennent, ce sera vne action de prudence, que vous resoluiez le chemin de vostre vie. Que si vous desirez

euitet les incommoditez & malheurs, qui vous
 menacent, vous ne pourrez mieux faire, que sui-
 uant mon conseil incontinent reuenir vers nous,
 & prendre l'habit de ceste compagnie, ou avec
 l'assurance de vostre ame vous trouuerez préparé,
 voire plus de ce qui peut faire besoin en ceste vie,
 à vn courage genereux, & personne noble comme
 vous: Et en somme ce que dans le monde ou en vne
 autre Religion vous ne pourriez iamais trouuer: &
 que ce nom austere de Religieux ne vous espou-
 uante, ou celuy vain supposé du cloestres: car ce
 n'est chose miserable estre de ceste qualité: Au
 contraire c'est vn grand aduantage sur tous ceux
 que peuuent auoir les hommes en chaque ville &
 autres congregations ciuiles, estant vrai que si nous
 considerons en general le Religieux, outre qu'il e-
 xerce les ministeres sacrez, plus venerables que
 quelque precieux thresor que ce soit, il vit sans
 peine reueré & honoré de chacun, tant aux cer-
 monies publiques, que particulieres, assisté en ses
 necessitez, exempt de factions personnelles, de
 guerre, franc de toutes sortes d'impositions, libre
 des duels & pointilles d'honneur, & de plusieurs
 faulces & populaires opinions: & les cloestres
 mesmement ne sont pour les enfermer, mais pour
 fermer aux autres la cognoissance de leurs affai-
 res: & avec peu de travail redisant les louanges du
 Seigneur, iouyr de la vie la plus libre, & plus assen-
 ree. Que si apres vous venez à nostre particulier,
 vous y trouuerez vne condition de beaucoup
 meilleure, attendu que nos compagnies, ne sont
 point claustrales, ny n'ont aucunes autres obliga-

tiōs extraordinaires de disciplines, ieufnes, vigiles, actiōs, qui rendās les perſones ſtupides, les rendent auſſi inhabiles à la conuerſation & aux maniments neceſſaires pour le ſalut de ſon prochain, comme toutes ces anciennes Religions lesquelles eſtans inutiles à l'Egliſe Romaine, ont beſoin de ſemblables actions qui conſiſtent en apparence, ou nous autres exempts du lieutrein, des pourceſſions & mortuaires comme les autres ſimples Preſtres, iouyſſans d'une liberté ſeculiere, bendons toute noſtre induſtrie aux actions qui font regarder & admirer leshōmes, & qui par ſemblable font agrandir & exalter le S. ſiege de Rome. C'eſt pourquoy noſtre merite reconnu d'iceluy, toutainſi que de iour en iour il va oſtant les priuileges & indubitez des anciennes Religions (cōme inhabiles) pour l'agrandiſſemēt dudit ſiege, Ainſi il les va adiouſtant & empliſſant d'heure à autre à nous ſes miniſtres vtils. Ces particularitez, outre quelles vous peuuent aſſeurer de la facilité de mon ſtatut, vous font auſſi clairement cognoiſtre quel aduantage a noſtre congregation emporte ſur toutes les autres Religions, & cela n'eſt pas ſans tres importantes raiſons, pource quelles eſtans fondees ſur les extremitez, elles ne peuuent ſubſiſter: Outre quelles ſont dangereuſes pour les ames: attendu que les Monachales qui ne trauaillent qu'apres les ſeules richelſes, pour ceſte occaſion ſont deuenues ſerues du peché & du monde, & pour icelles encor enuiees, de ſorte que iournellement elles tombent en commande, n'en eſt laiſſé, qu'autant qu'il eſt de beſoin pour tirer le reuenu des eſtats eſtrangers pour les

affaires des Prelats, & de la court Romaine. Les Mandians puis apres sont mesprizez pour leur affectee pauvrete, vont recueillant toute aumosne pour petite quelle soit, Mandians iusques & parmi les villages, & à l'instance de toute mecanique femmelerte, pour petit & vil: prix, celebrent les saincts sacrifices, & communient les diuins misteres dans les chappelles & maisons particulieres, se meslans dans le monde, & se souillans dans les erreurs d'iceluy, ce qui a fait naistre l'vrgente occasion de penser aux reformatations, quoy quelle ne s'accorde encor à leur totale destruction. Mais nostre societe ainsi qu'une Republique bien instituee par la prudence & habilité de nos Peres, colloquee sur la mediocrité, ne s'esleuant point par dessus la Monacale opulence, ny aussi peu s'humiliant iusques en la basse mendicité, participant seulement de l'une & de l'autre, autant qu'il est besoin pour le service de Dieu. A tousiours pour but avec vn certain salut des ames, les plus importants, & releuez aduantages de la foy Catholique Romaine, de sorte que fauorisee des souverains Pontifes, respectee des Princes, & reuerree des peuples, esgalant les tours du Soleil, sera avec ses enfans par toutes les parties de la terre, glorieuse & bien heureuse au ciel, de là naissent ces enuieuses voix formees par ces deprimez, non emulateurs contre nos façons & doctrine exemplaire, qui vous doiuent bourdonner aux oreilles & par lesquelles vous cachant de mes yeux, parauenture vous vous ferez esloigné de ceste maison. Ils nous blasment en premier lieu d'arogance, pource que nous qualifions

compagnie de ce que toute autre Religion a peine
ce nomme ferue: & neantmoins il ne se trouuera
personne, qui iugeant d'un esprit sincere, ne reco-
gnoisse qu'ayans esté esleuz par la diuine prouiden-
ce, pour regle, & correction des autres, il ne soit
aussi raisonnable que ceste sienne chérie congrega-
tion, soit par quelque tiltre insigne, & specieux di-
stincte de toutes ses autres sectes inutiles de Moy-
nes & frairies: Outre cela ils nous taxent que nous
dédaignons vestir la haire, ou nous nourrir de vian-
des grossieres: mais en ce mocquans de nous, disent
que nous sommes vestus de fine laine, & que nous
portons sus la chair de tres-blanches toilles de lin,
nous nourrissants des meilleures & plus delicates
viandes qui se puissent trouuer en la ville ou ter-
roirs circonuoisins: d'auantage que fuyans l'habi-
tation des villages ou soubz les humbles toictz
de nos peres (espanduz en plusieurs parties du
monde) ayans excogité toute commodité, nous
possessionons par tous les Royaume des la chrestienté
les plus excellens Palais & en meilleures situa-
tions qui y soient, nos maisons ne se fondans ia-
mais en villages ou petits chasteaux, mais aux vil-
les principales, habondante de tout ce qui fait be-
soin au genre humain, lesquelles choses encor nous
n'acceptons pas si premierement le reuenu n'est
preparé, & les demeures en abondance, pour le
nombre des Peres & leurs coadiuteurs temporels.
Ces passionnez detracteurs ne prennent pas garde
que ce qu'ils ont disants des vestemens, viandes,
& logemens, tourne a vne louange extreme de
toute la cōpagnie, & du Pere Ignace nostre premier
fondateur,

fondateur, lequel comme homme tres-sage par
 dessus tous les autres, cognoissant que les habits
 grossiers, les haires, les viandes champestres, qui
 sont pures afflictions du corps, affligent aussi & de-
 bilitent l'esprit, nous en a deffendu l'usage, & a
 voulu que nous fussions pourueus des habits & a-
 limens qu'il appartient à ceux qui pour l'exulta-
 tion de l'Eglise catholique Romaine exercent l'es-
 prit aux estudes, & la langue, & l'imitation des
 tressaints Apostres, aux exhortations publiques &
 priuees. Quand aux logemens, qui ne voit que cela
 se fait pour la decoration de la sainte Religion &
 partant estre necessaires, puis qu'en iceux se doit
 nourrir le seminaire des hommes, par lesquels l'E-
 glise, & toute la Chrestienté se gouuerne. Au sur-
 plus quand a la doctrine, ces mesdisans, estans inca-
 pables de soustenir les vrayes resolutions, non seu-
 lement impuissans pour esgaller les actions & tra-
 uaux de nos compagnons, ils vont se travaillants
 pour remettre le tout au vouloir & plaisir de Dieu:
 ils font paroistre nostre grand merite, nous appel-
 lant Pelagiens & disciples d'Epicure, pource que
 comme acertene le nom iamais assez loué Molina,
 que Dieu ne veut pas mouuoir Physicalement
 l'esprit des hommes, mais qu'il demeure attendant
 en sa quietude eternelle, que par le merite des
 bonnes œuures, neantmoins acheminez de sa
 grace, d'eux mesmes ilz s'aquierent le Para-
 dis. Les aueugles ils ne voyent pas que Dieu im-
 mobile en sa diuinité, immediatement, & par di-
 uers moyens agrandit sa gloire, & que nous pour
 cest effect sommes ici bas enuoyez par ceste Maie-

esté afin de prouigner son royaume, & par le moyen
 de nos regles & liures spirituels, avec la force de
 persuader qu'il nous donne, esmouuoir les ames, &
 faciliter le chemin du ciel à tous les fidelles, les-
 quels se despouillans de toute politique curiosité
 obeyront sans plus à nos preceptes salutiferes. Et
 quel signe plus grand le monde peut-il desirer de
 la bonté, & integrité de nostre doctrine: si par
 nous les publiques erreurs des plus grandes vniuer-
 sitez du monde ont esté corrigees? Comme en par-
 ticulier de la Royale cité de Paris, en laquelle hors
 mis quelques vieux lettrez, tous les modernes, &
 ieunes Docteurs ont facilement acquiescé à nostre
 doctrine: N'escruians plus que les fautes des sou-
 uerains Pontifes: quelques exorbitantes quelles
 soient, puissent estre corrigees par les Conciles, ny
 ne soustiennent qu'il est loisible à leur Prince d'em-
 pescher la libre administration des choses Eccle-
 siastiques, & autres Maximes importantes de ce
 royaume; point, qui estoit estimé indoyable pour
 la multitude des raisons, & fatigues inutiles de plu-
 sieurs: & neant moins emporté maintenant pas nos
 Peres: le dy ceste tant chantee liberté de l'Eglise
 Gallicane, de sorte que ce monstre enseveli par les
 nouveaux Hercules de la Theologie, sans contre-
 dit par toutes les principautez, l'absoluë puis-
 sance du saint siege de Rome ce recognoit: N'en est ce
 pas encor vn tesmoignage indubitable de veoir
 comme parmi nous (malgré l'heretique meschan-
 cété) toutes les sciences diuines & humaines flo-
 rissent? Et qu'ici se trouuent des hommes insignes
 & maistres celebres, par lesquels puis apres sans

ceste aide fain du denier, la plus grande ou meilleure partie de la ieunesse Chrestienne s'instruit: à la confusion de ces passionnez, & interessez. Pedans lesquels si tost que nos Peres ont paru, leurs emoluments & profitz ayant cessé, ils ont procuré par diuerses impostures racher & souiller nos louables actions, publians que non la charité, & amour du prochain, mais ayants pour but le plaisir, & l'vtilité, nous auoit fait entreprendre l'instruction des escholliers, faisans voir que seulement lon a esgard aux riches & aux beaux: Pour les autres, lon ne se soucie de faire autre plus grand profit, sinon entant qu'il est expedient de conseruer ceste apparence, avec laquelle nous tenons les Peres, & parens perpetuellement esclaués, & obligez. Ilz adioustent de plus, que sous le manteau de la tresainte Religion, nous semons dedans les tendres esprits de ces subiectz ou citoyens, qui viennent à noz escholles, des semences de mespris & desobeissance vers leurs Princes naturels, leur persuadans qu'ils doiuent seulement croire & obeir à vn autre Prince par nous esleué, pour Monarque vniuersel: & par telles diaboliques inuentions ont creu qu'ils pouuoient nous faire defendre les escholles, Comme il est arriué à vne noble ville d'Italie au damage neantmoins des nobles, & des principaux enfans d'icelle, & d'autres qui y affluoient pour estudier: ausquelles mesdisances proferees par des langues interessees, quoy qu'amplement lon peult respondre, ie les passerai souz silence, suiuant nos regles logicales, ie vous dirai seulement que les biens de fortune sont necessaire à qui

desire s'appliquer aux lettres, & que la beauté est vne marque asseurée de la viuacité de l'esprit, & bonté de l'entendement : de sorte que si l'on s'employe à l'endroit de ceux qui sont dotuez de tels dons, nous le faisons comme en subiets propres & naiz pour les disciplines, & non pas pour vne fin de plaisir, ou de profit. Quand au reste de ce que l'on voit qu'en tous lieux nos escolles sont recherchées, voire par les enfans des Princes, mesme avec vne telle affluence, les precepteurs ordinaires estans abandonnez, il s'en ensuit vne conclusiō infailible, Que tout ainsi qu'en existence & reputation nous surpassons toutes les autres Religions, de mesme les doctrines qui sortent de nos maisons, & colleges surpassent en pieté & solidité de resolutions toutes les autres: voire fust ce de saint Thomas & de Scotus : c'est pourquoy ce qui est deffendu aux autres est licite parmi nous, veoir & tenir les liures & escritures desquelles quelquesfois pour le bien general en auoit le nom des impies, recouert du nom celebre de nos Peres, nous le renuoyons en public, & verrez mesme de vostre temps non plus Aristote ou Ciceron monstrueuses memoires du Paganisme, mais les chaires ornees de plus illustres auteurs lire par tout sans plus les *Alueri Toleti Molina*, & autres grands Docteurs de nostre Societé, de sorte que telles & semblables detractations machinées de haineux pour deprimer nostre doctrine, & non inculpables meurs, comme par la raison on peut voir (ainsi que l'or & pierreries froissée) les rendent plus clairs & resplandissans, & quand

Quelque doute de ses flatteurs vous seroit demeuré
 en conferant avec moy , non seulement
 ie vous en esclarciray & respondray , mais vous a-
 yant rendu capable de la verité , i'espere que d'au-
 tant plus vous vous conformerez à embrasser mon
 bon conseil : & soyez assuré qu'icy parmi nous
 avec toute sorte de commodité & contentement,
 vous trouuerez moyen facile de vous esleuer selon
 la generosité de vostre famille , aux honneurs , &
 grandeurs plus importants, & pourrez par la faci-
 lité de nos sciences , moyennant la viuacité de vo-
 stre esprit reussir honorable, soit à prescher, soit à
 enseigner , & de l'un ou de l'autre r'emporterez
 grande vtilité, avec vne reputation non petite, at-
 tendu que vous serez seruy & honoré d'hommes,
 de femmes, du peuple & des Seigneurs, & ne pour-
 rez rien desirer, qu'aussi tost sceu, ne vous soit
 de tous endroits donné & offert. Les maisons
 des particuliers vous seront ouuertes, l'on prendra
 conseil de vous pour les affaires des villes les plus
 importantes, chacun vous fera part de ses secrets:
 & quand en cela vous voudrez employer vostre
 esprit à bon escient (accrochant avec ceste extrin-
 seque ombre de pieté, l'opinion du simple vulgai-
 re) vous deuiendrez ainsi qu'il vous plaira de Mai-
 stre & de Predicateur, non en apparence, mais en
 effet Empereur & Monarque. Et vous concilirez
 non seulement des honneurs & commoditez, mais
 vous rendant glorieux, pourrez agrandir & enri-
 chir nos Compagnies, comme ont fait plusieurs
 Peres en Polongne, Transiluanie, Autriche, Baui-
 re, Espagne & autres lieux, finalement aux Indes,

où vne nouuelle vigne de Christ, vne tresgrande monarchie par les mesmes Peres a esté exigee, & plantee pour nostre Societé. Surquoy i'auray extremement agreable, qu'avec de la curiosité vo' fissiez vne exacte information de tout ce que ie vous escri, pource que vous trouueriez que toutes les prouinces souz mises à l'Archiduc Ferdinand sont gouuernees biē heureusement par la surintendance de nostre Cōpagnie: disposant en icelles des dignitez, & magistrats, & iusques aux affaires cōcernāt la guerre ils se maniēt par leur conseil. En Baviere semblablement tout se gouuerne par la prudence de nos Peres. La Transiluanie est entierement gouuernee par le Pere Cariglia, laquelle pour le seruice de Dieu il a fait tomber es mains de l'Empereur. Le Pere Cotton ne gouuerne il pas la France & le Roy mesme? Et en Pologne nonobstant la resistance de quelques mauuais Chrestiens, le Roy ne vit qu'inspiré de nostre sainteté. En Espagne, Portugal, Flandre, Italie, Sicile, qui ne cognoit les richesses que nous y posledons? mais que diray-ie du Pere Person, lequel estant à Rome a plus d'autorité en Angleterre (d'où il semble que la Religion Catholique Romaine soit bannie) que le Roy mesme? Et ny a Comte, Marquis, ou Prelat Catholique, qui n'aye pour surintendant & gouuerneur de sa conscience quelqu'un de nostre Compagnie. Et pour conclusion de tout, nostre General, comme chacun sçait, gouuerne Rome, & le Pontificat: sur lequel propos ie ne veux oublier de vous descourir, que nous autres auons vn quatriesme vœu d'obedience au saint Siege, pour aller (*non perito via-*

tico) c'est a dire marcher & aller par tout sans rien
 payer, en quelque lieu qui luy plaist nous enuoyer,
 par le moyen duquel nous estans rendus confidens
 Ministres dudit Siege, & participants de ses plus
 importants secrets, nous faisons trouuer bon aux
 Pontifes ce qui tourne le plus à nostre benefice,
 mettant en necessité ceux qui aspirent à quelques
 tiltres, & prelatures, d'auoir recours à nostre inter-
 cession, & remarquez de ce ministere Pontifical
 nous attirons à nous l'opinion du malade, penetrant
 dans les villes, Royaumes, & dans le cœur des Prin-
 ces mesmes : Et où ils n'ont puissance que sur la
 vie & biens, nous prenons possession sur leurs vo-
 lontez & de leurs subiets : si qu'esgaulx, avec la
 sainte Foy, laquelle comme elle faisoit de tres-
 grands progrés où elle entroit, ainsi nous autres
 où nous hantons insensiblement avec le nom de
 Iesus nous acquerons telle suite que puis apres il
 n'est plus en la puissance des Princes de nous en ti-
 rer : Et de ce en peut faire preuue le grand & puis-
 sant Royaume de France en ses derniers troubles,
 & pour ceste occasion estans souuent deuenus ar-
 bitres des differents, non seulement de Prince à
 Prince, mais aussi entre Seigneurs & vassaux, ainsi
 qu'il nous a pleu, nous auons esté moyenneurs de
 la paix ou de la guerre dans le monde, ny mesme
 sans vne apparente pretension que la possession du
 saint Siege tombant vn iour en nos Peres, y puisse
 successiuement demeurer à perpetuité. Ce que
 quand il arriuera, sera vne si notable augmentation
 à la Catholique Religion, qu'en brief l'on pourra
 esperer de voyr se faire de routes les principantez

Chrestiennes & de tout le monde (*unum omne & unus Pastor*) ne demeurants pourtant liez par vn tel vœu, où il yroit aucunement de sa domination de nos libertez ou preeminences : Au contraire crains & estimez nous nous asleurôs quelquefois par zele de Religion, tenons nos plumes & nos langues contre les mesmes Pontifes, speciallement y concernant de l'interest d'aucun grand nostre bien-faïcteur: Et ny a personne si hardy, d'obiecter chose aucune contre nous, maniant l'autorité Pontificale, d'autant que poursuiuis, par les nostres, il seroit reputé de chacun pour Heretique, ou Schismatique : si que par telles graces celestes nous nous conseruons iusques icy sacro-saints & inuiolables. Mais si d'auanture le courage ne vous porte à vous mesler aux grandes affaires du monde, & vous hazarder en la familiarité des Princees, il demeurera en vostre choix, en quelle maison & & College vous aurez agreable iouyr d'vn tref-heureux repos, & preschant par les Eglises, nourrir la pieté parmy les hommes apprehensifs, & les femmellertes deuotes : Et par ce moyen reussirez autant beneficié & honoré: pource que tenant vos confessionnez en deuoir, avec admonitions pleines de terreur & miracles ramassez de nos Peres, afin qu'ils s'abstiennent des pechez, vous disposerez en l'honneur de Dieu de leurs biens & de leurs personnes, ainsi qu'il vous plaira. Et bien que nostre saint zele malicieusement interpreté soit entendu en vn sens reprouné, & que lon face courir qu'en r'aportant diuersement les mesmes choses à cestuy cy & à cestuy là, nous semons des discords, &

noy les

noy les entre le mary & la femme, entre le pere & le fils entre freres & parens, & par ce moyen tenant en luspends la ballance de nos conseils, nous vsurpons la domination & absolue tyrannie sus les particulieres villes & Royaumes entiers, nonobstant telles actions ne peuuent reallement estre blasmees, pource que le tout ne tend qu'au salut des ames : Et en cela nous sommes confermez par la parolle Euangelique qui dit, *Non debet paxem interire in terram sed gladium* *venit enim separare hominem aduersus patrem suum, & filiam aduersus matrem suam.* Et partant ce n'est point erreur de parler ou traiter contradictoyrement, ou tenir les coutrages des parens, ou citoyens desunis, pourueu neantmoins que le tout soit au benefice du saint Siege de Rome, au seruice & grandeur duquel consiste la vraye pieté, & le sommaire de la Religion : Et en cest endroit pour vous purger de certain scrupule, qui vous pourroit tomber en l'esprit ; par vn certain bruit populaire : le veux vous aduertir que les principaux Seigneurs, & les plus nobles Dames de la ville, selon leur deuotion affluants à nos Eglises, les enuieux tournants le bien en mal, disent que cela procede de nos artifices, semants par tout que nous nous rendons difficiles à Confesser le menu peuple, ou les pauvres personnes, & que nous les chassons d'autour de nous, nous monstrants à leur endroit rigides aux absolutions, aspres à les reprendre, & insupportables aux penitences : Au contraire, à l'endroit des riches femmes, veufues & mariees, nous nous comportons fort diuersement, avec peu ou point de penitence, & bien souuent sans Con-

fession auriculaire, par la simple ostension d'un
 roole de fautes enregistrees nous leurs remettons
 de fort lourds pechez, voullans de chaque peni-
 tent la confession generale, non commandee de
 Dieu, & aussi peu necessaire pour le salut de l'ame,
 pour pouuoir descourant leurs naturelles inclina-
 tions, suiuant icelles iustifier leurs pechez, & leur
 permettre l'usage & la iouissance de ce que les au-
 tres Religieux ne leur permettoient iamais, & la
 grande patience que nous supportons pour purger
 les foibles esprits des femmes, des scrupules, & su-
 perstitions, ausquelles naturellement elles sont su-
 ietes (par telles sortes de gens estant assigné à mali-
 ce). il se dit que nous yfons avec elles de longs &
 ordinaires discours, par le moyen desquels nous
 obtenons tout ce que l'on peut desirer, confirmant
 le secret, par le tres S. Sacrement nous nou mesliōs
 avec elles par mariages spirituels, faisant par tout
 paroistre les troupes de Orselines & Clergesles,
 Dyaconesses, ausquelles mesmes en cas d'impor-
 tante necessité, nous promettons d'administrer les
 tres-saints Sacraments, par le moyen d'une certaine
 representation par nous inuentee, en donnant à
 baiser à leurs sœurs en leurs conuenticules, vne me-
 daille benite, en forme d'Agnus Dei, au lieu de pren-
 dre l'hostie pour les tenir en ceste façon, & con-
 iointes entre elles avec nos biens & estroittement
 obligées au saint Siege, en cas de quelque politique
 resistance ou discorde, & afin que leur deuotion
 passe iusques à leurs marys, parens, enfans, & autres
 alliez: Ce qui s'est pratiqué en des occasions pas-
 sees depuis peu, avec remarcable vtilité: & neant-

moins en partie descouvert au iour par trop pene-
 trante sagacité de nos emulateurs, & la simple con-
 fiance de ses deuotes petites ames, esloignées des
 oracles de nos conseils, & priuees de l'appui neces-
 faire de leur frugalité. Outre cela nous viuons hors
 de danger que nos actions, ou nous residons en pos-
 session, viennent iamais à estre sceues. Puis que pra-
 tiquans seullement avec les grands, desquels outre
 les presens journaliers, nous entendons tous les se-
 crets du public, de sorte que la conseruation de
 leur honneur propre, leur tient la bouche fermee,
 au rebours des autres Religieux qui indifferemment
 frequentans avec chacun: sans l'ayde de ses saintes
 artifices, difficilement peuent cacher leurs fragi-
 litez: Mais encor' telles menees se peuent facil-
 lement dissoudre, pource que telles, & toutes au-
 tres nos actions, nous les faisons avec mystere, at-
 tendu que ces qualitez de pechez ou importances
 de cas, n'auoyent aux pauvres gens, pour la reso-
 lution desquels il soit besoing d'une intelligence
 extrême ou profondeur de discours: Mais leurs fau-
 tes sont pechez vulgaires, & accoustumees, aus-
 quelles quelque chetif Moyne que ce soit, pou-
 uant satisfaire, la diuine Maieité auroit desagre-
 able, que nos trauaux elabourez se perdissent inuti-
 lement en cela. Que si se confessant à nous, ils nous
 recongnoissēt apres & seueres, ce n'est pas pour les
 chasser, mais nous le faisons afin que desplaisants
 des ordinaires pechez, ils s'abstiennent des pires ou
 plus enormes. Ce qui n'arriue pas des riches, les-
 quels à cause du maniment des deniers affaires pu-
 blics, auxquels ils sont employez, sont exposez à

beaucoup de scrupules, & doutes dangereux : & pour cette occasion il resulte au grand profit de leurs ames, qu'ils soyent examinez & corrigez par les hommes doctes & sages, comme de nos Peres : & pour ce subiet nous les receuons volontiers en nos Eglises, & les traittons doucement, de peur qu'ils ne s'emportent au desespoir : Mais plustost afin qu'avec les richesses qui ont esté suiet de leurs pechez, faisans de grandes aumosnes à nos maisons & Eglises, gaignans le ciel ils quittent le chemin qui les conduiroit en enfer. Tout de mesme nous procedons doucement, & sans rigueur enuers les Dames, à cause de la fragilité du sexe, & pour plus facilement les induire à l'obedience, l'on a de coutume de leur permettre quelques choses de peu d'importance, pourueu que recognoissans le tout cōme facture de Dieu, elles luy en rendent les graces deuës : Ny ne recherchons d'elles ny de celle cy ny de ceux là les confessiōs generalles pour fauoriser leur appetit, mais plustost afin de descourir leurs meschantes affections, & mauuaises inclinations de leur nature, ausquelles differement par apres nous appliquōs à chacune sa medecine particuliere : & ne dōnons pas cōme ces anciens religieux cōfusement à tous les pecheurs vn mesme remede (moyē salutifere qui nous a esté reuélé de Dieu pour l'exaltation de sa foy) avec lequel descourant d'abondant les courages forts, & resolus, plusieurs fois les auons employé de propos deliberé par le moyen de nostre chambre de Meditations, le secret, de laquelle il n'est licite de reueler pour la memoire des heretiques, & ennemis desobeissants du saint siege de Ro-

me, non seulement contre des personnes particulières, mais contre de grands Princes, & Roys, accomplissans par tels faits heroïques la figure du bon Aod qui se liët en la sainte escriture, fournissans de saints & martyrs les sieges de Paradis, avec l'ouange immortelle de nostre congregation, dequoy peuuent rendre tesmoignage plusieurs effigies qui se voyent imprimees en œuures de diuerses formes, & chacun des surnommez hōmes & femmes ne deuroient prendre les tressaints Sacremens, & exercer la confession en autre lieu qu'en nos Eglises, auxquelles outre les commoditez, & priuileges concedes par les Souuerains Pontifes, au moyen desquels nous pouuons absoudre de toutes sortes de pechez, ils trouuerront vn moyen de nostre inuention facile, pour sauuer les ames, qui consiste seulement à se despouiller de sa propre volonté & sans se traualler à rechercher autre chose, suiure les commandemens de ceux qui estudent, & se peinent ou traualient pour eux qui sont leurs peres spirituels, & par ce moyen est osté tout danger pecher, qui n'a esté veu ny cognu des autres Religieux, lesquels nourris à l'ancienne simplicité, laissans leurs penitens en liberté, n'ont fait, ny ne feront iamais grand profit. Et quoy que les Polytiques & autres sages du monde nous l'attribuent à herisie, pour cela ne doit on faire aucun cas de ce qu'ils disent, puis que l'on voit que les Euesques, les Cardinaux, tous les Papes l'approuuent. Et pour conclusion ce qui releue plus que toute autre chose, importe à ceux qui frequentans nos Eglises embrassent ceste sainte obediēce est que l'on les fait participans des innom-

brables graces qu'il tient à l'endroit de sa diuine
 Maiesté suffisans non seulement pour oster les fau-
 tes passees, mais pour aneantir toutes celles qui se-
 roient à venir, & redimer quelque ame que ce soit,
 qui auroit esté condamnée au Purgatoire: Aussi peu
 ne voudroy .ie pas que vous craignissiez de rencon-
 trer aucune difficulté pour acquerir les honneurs
 & commoditez, dont ie vous ay parlé cy deuant, at-
 tendu que le chemin qui en nostre Societé conduit
 à iceux, est si battu, & ordonné avec tant de pruden-
 ce, que sans mettre le pied a faute, chacun peut es-
 perer de les obtenir, & en iouyr, estant certain que
 là continuellement il s'agit de parler & de travail-
 ler, & se prend aduis sur tout ce qui paruient aux
 oreilles soit public, ou priué, & iamais aucun n'est
 employé à chose aucune que premierement la natu-
 re examinee, & son talent consideré par le pere ge-
 neral, qui aduerti de chacun en tient registre tres-
 particulierement separé, il n'ait esté recognu pro-
 pre pour effectuer, puis apres ayant aduis de ce qui
 s'est passé en la iournée digne de consideration, se
 descouure par les discours familiers ou par la con-
 fession de nos deuots, & le conferans entre nous, &
 l'escriuant de maison en maison allons nous prepa-
 rans par prevention aux choses aduenues & qui se-
 roient pour aduenir, à semblables consultations, &
 conferences aucun ne demeure irresolu, les plus an-
 ciens, & habilles Recteurs que nous ayons y assi-
 stent, lesquels tres versez en chacune matiere, defi-
 nissent comme on doit persuader l'obedience aux
 hommes & femmes vefues & mariees, faire du bien
 aux colleges, & à nos personnes particulieres pour

s'acheminer à la voye de Paradis: La façon de s'influ-
 nuer en la grace des Princes, avec quels moyens lon
 gaigne leurs volontez, & par lesquels l'homme peut
 prendre la possession de l'esprit & opinion du peu-
 ple. Qu'en cela nos ennemis trauaillent, ignorans de
 la volonté celeste, qu'ils mesdisent que nous avec
 telles regles & inuentions nous apportons domma-
 ge aux maisons particulieres, & aux principautez
 du monde, acertenans aux vns, qu'avec nos admoni-
 tions pleines de crainte, telles que nous les pres-
 chons aux simples par les Eglises, & aux ames ex-
 pirantes dans les maisons, nous enrichissans en par-
 ticulier, & nos edifices, nous despouillons les en-
 fans mesmes, & propres parens des successions qui
 leur appartiennent, aux autres pource qu'alseurans
 les Princes Chrestiens par vne feinte seruitude, en
 faueur de la grandeur Ecclesiastique avec impru-
 dents conseils, nous les faisons perdre & l'estat & la
 vie, Voire mesme les scandaleux Politiques s'effor-
 cent de rendre odieuse au monde ceste singuliere
 pieté, qui s'exerce pour l'agrandissement du saint
 siege, la denigrant du nom de trahison & rebellion
 commise, affermans que les predications, & recom-
 penses de richesses, & louanges par nous inuentees
 pour l'extirpation des heretiques, estre moyens de
 trahison à l'endroit des Princes, & voix flateresses,
 avec lesquelles nous masquons de sainteté, & de
 Martyres les parricides, s'escriâs faulsement, que par
 les mêmes voyes d'extinction cōtre la vraye foy de
 Iesus, nous meritons le nom de Iesuites, par lesquel-
 les Scipion ruinant l'Empire de Carthage s'aquit
 celuy d'Africain; puisque tout considéré comme il

appartient, ce n'est aucunement peché, ains vraye & seule pieté, puis qu'elle resulte au benefice de l'Eglise Catholique Romaine, & au seruice des ames, qui luy sont deuotes.

Premierement, il n'est point mal seant que le Pere pour son propre salut priue le fils, ou le parent, de la succession: attendu que selon la doctrine Evangelique chacun est plus obligé à son ame, que à son pere, mere, & enfans: de sorte que ce sera mesme œuvre meritoire, quand vn Prince (plus affectionné de ses propres iurisdicions ou commodité de ses subiets que du salut de son ame,) se rendra restif à obeir aux commandemens du Pape, absoudre les subiets du serment de fidelité, & declarer que ne se pouuans gouverner d'eux mesmes, ils s'approchent d'un autre Prince Catholique obeissant & associé du Pape de Rome. Et quand pour la puissance & forces du desobeissant, lon ne pourra venir a telles manifestes declarations, aussi peu sera il contraire aux loix Canoniques, & tressainctes Decretales en cachette par absolutions de pechez, ou salaires des meurtriers, luy oster la vie. Ce que par semblable afferme nostre tresdocte Historien Iean Mariana en vn traicté desdié au grand Roy des Espagnes, ou proposant les poisons & ses compositions pour vn plus assuré moyen. Il conclud que pour semblables effects, tels poisons deuroient estre tousiours preparez chez tout bon Catholique. Et en la sacro-sainte Bible il se lict par l'exemple de Ieroboam & autres, comme les Roys du peuple aimé furent chastiez par les Prestres, & prophetes sous la main de Dieu, de leur desobeissance: de sorte qu'en

te qu'en ostant la pestifere semence des Politiques il seroit du grand benefice des peuples, que les puissances temporelles, & spirituelles estans vnies, ils fussent gouuernez & conduits par nous autres Ecclesiastiques, pource qu'ils seroient traitez avec plus de pieté: & telle deliberation estant preschee par nos Peres en tous endroits, deuroit estre receuë non moins qu'un article de foy: attendu que les autres dorment, & nous tousiours nous vueillons pour leur salut. Et afin que vostre esprit demeure plus grandement satisfait de nostre tresprudent gouuernement ou Republique, non iamais si parfaitement descrite par aucun Philosophe, mais miraculeusement fondee par ce Celebre Ignace Loyola, lequel en l'an 1521. chef des armées Castillanes en Pampelune, ayant maintenu la validité de l'excommunication de Iules second contre le Roy de France & de Navarre, merita de Dieu, pour la valleur qu'il fit paroistre, & pour les bleseures souffertes en sa personne, estre aussi le chef & fondateur d'icelle, establisant ceste Societé, qui à son imitation deuoit maintenant & à tousiours continuer à defendre & agrandir l'autorité Ecclesiastique, & des Pontifs Romains. Je veux donc encor' vous faire sçauoir d'icelle, que cōme icy dedans il y a plusieurs voyes, aux bons pour receuoir le salaire de leurs vertueuses actions, de mesme nous cheminons avec un grand esgard pour la punition des fautes, & ou les autres avec peines apparentes & de douleur

manifestent au monde leurs propres deffauts, Nous suyuant le precepte Euangelique, euitans les scandales, avec de prompts & secrets ostracismes, ou bien quelques honorables & loingtaines relegations, nous purgeons toutes sortes de fautes, dequoy puis apres, il n'est permis sur peine de tres-grief peché à aucun, en quelque temps que ce soit, d'en faire mention, mais tousiours dire également du bien de tous. En somme nul respect ne vous doit retarder, attendu que toutes choses, qui de prime face vous pourront auoir semblé difficiles & laborieuses les pesant, ou vous discourant sur icelles, comme celles cy, vous les trouuerez toutes accommodees à l'honneur, & vtilité des peres, & enfans de nos maisons, & telles quelles imitent chacun d'employer les songes & pensees pour s'en pouuoir rendre participant. Je desirerois seulement que vous laissassiez voir pour autant de temps qu'il pourra suffire à vous decouurir quelles commoditez & plaisirs s'espreuent sous ce mal-plaisant (mais saint) (zele de Religion,) & en particulier les honneurs, & contentemens, qu'avec ceste humilité, & abiection de vie exterieure, reçoquent les enfans de nos maisons & Colleges : C'est pourquoy ie suis asseuré, que changeant de pensée, vous retournerez incontinent à vostre premiere resolution : & si ie n'apprehendois d'ecrire certaines choses, & que la verité ne fut prise pour mensonge, ie vous ferois paroistre cōme nos Eglises sont les nids tres-certains des

voluptez spirituelles, & les maisons & Colleges, les magasins d'une tres-sainte vsure, où il est permis à ceux auxquels il est concedé pouuoir, asseruir ou sans scandale tous les desirs, & sans aucun crime acquerir plusieurs commoditez avec des richesses non mediocres, lesquelles apres nous pouuons entre nous posseder, & en iouyr: Comme aussi vous reconnoistrez par effet, quand vous aurez fait profession solemnelle, vous esleuant d'entre la tourbe des autres du simple veu, participans de l'absolut commandement, & autorité de nos Primats, vous serez reueré & obey. Et quoy que ie ne vous escriue qu'une partie de ceste verité, en taisant beaucoup d'auantage, neantmoins estant tiree de la propre experience, reussiroit pourtant beaucoup mieux, si de bouche & en presence avec le doigt vous remarquant les endroits, ie vous faisois veoir les choses propres, par ce que vous mesme faisant avec l'intellect vne reuerberation sur ce que ie vous ay discouru, vous cognoistrez combien mon amour est beaucoup plus sincere que celuy flatteur, auquel vous vous estes miserablement laissé embrouiller: Comme encor ie croy vous l'auoir fait paroistre par autres trescourtois effects. Principalement lors qu'en vostre aage plus tendre content de ma protection ceste maison estoit frequentee de vous, & moy rendu ialoux gardien de vostre iunesse. Je m'en rendis tres mortel ennemy des propres Peres & freres, ne permettant que simplement de regards, tant

s'en faut que de maius incontinentes elle fut
 touchee ou contaminee, comme maintenant.
 Et si quelquefois i'ay folasté avec vous plus li-
 cencieusement que ie ne deuoy, ç'a esté par vn
 artifice permis en nos colleges, pour accoustu-
 mer par allegresse les escolliers, a obeyr plus
 promptement aux maistres, & apprendre
 mieux. Accompagné de l'amour excessif, que
 i'auoy, & que i'ay continuellement de vostre
 salut, non pour vous offenser, ou deshonorer.

Que ce soit donc maintenant la fin d'vne si
 longue absence : & retournez tel que l'enfant
 Prodigue, à vostre Pere spirituel, & à vostre
 Maistre. Souuenez vous que vous estes mortel
 & que hors ce nombre de nos Compagnons,
 peu, & peut estre point se peuuent sauuer. Ac-
 complissez les vœux & les promesses, & re-
 congnoissant vostre faute, euites la vengeance
du Ciel.

F I N

